

奴道過車師北復遣開陵侯將樓蘭尉犁危須凡六國

兵別擊車師勿令得遮重合侯諸國兵共圍車師車師

王降服臣屬漢昭帝時匈奴復使四千騎田車師宣帝

即位遣五將將兵擊匈奴

師古曰謂本始二年御史大夫田廣明為祁連將軍後將

軍趙充國為蒲類將軍雲中太守田順為武牙將軍及度遼將軍范明友前將軍韓增凡五將也

車師

田者驚去車師復通於漢匈奴怒召其太子軍宿欲以

為質軍宿焉者外孫不欲質匈奴亡走焉者車師王更

立子烏貴為太子及烏貴立為王與匈奴結婚姻教匈

奴遮漢道通烏孫者地節二年漢遣侍郎鄭吉校尉司

馬憲

師古曰憲音許吏反

將免刑罪人田渠犁積穀欲以攻車師